

求是堂詩集

求是堂詩集序

詩三百篇垂諸經顧窮經與攻詩往往分途而不雅能兩  
漢經師闡發微言專求博奧諷詠則闕如而蘓李河梁古  
詩十九首皆非儒者之作魏晉下七子競爽沿波潘陸逮  
南朝顏謝之倫羣尚華藻而經學疎矣唐初孔賈沈宋判  
若冰炭開寶間經日衰詩日盛直賅一代何則詁訓名物  
文叢語繁註疏家每苦詰詘至抽妍騁祕憑虛而構率憚  
別爲探尋由是性旣偏嗜功難竝營雖通士尠克兼及者  
余友胡墨莊觀察少以詩賦鳴有清新俊逸之目比登第  
喜於經籍中精研考訂晨昏靡間著述斐然意不欲沾沾

言詩即詩亦愈進蓋君習毛詩最久沐浴溫柔敦厚之教  
確知指歸轉增益神智漱彼芳潤殆猶炙輶嘗觀司空圖  
詩品多取與象嚴滄浪之說務在不著一字盡得風流其  
弊卑者淪滑調高者墮禪機勦襲雷同毫無變化惟杜陵  
自道生平日讀書破萬卷下筆如有神推原厥旨必先事  
閱覽書味積胸然後涵邈而吐滂但恐填滯運思匪靈所  
以貴能破也而竟謂詩具別才不關學問豈篤論哉君詩  
音節悉本唐賢使典尤鎔其膏液棄其渣滓譬如大匠築  
室采楨雜施人第見美哉輪奐而莫識其鈎心鬪角之處  
又如善御者磬控縱送範我馳驅而水曲交衢和鸞自協

斯固才也實學所兼濟故體安以雅辭麗以則而寄託遙  
深詩之正聲庶幾弗墜曩官京師曾偕余預宣南社會每  
成章同儕傾挹以爲有根柢歸田後譔製稍稀去秋病劇  
始親定求是堂集若干卷竊念君早謝時榮就名山之業  
鄉間問奇漸闢門徑孱蹇如余尚幸互切磋商質經義暇  
輒唱酬爲樂乃一旦長逝堯峯丹溪黯焉減色余遂落漠  
寡懽趣回憶石巖蕭寺浩歌明月時茫若夢境此不能不  
撫遺編而累唏者也道光十有三年歲次癸巳夏四月同  
里姻愚弟朱瑋拜序

墨莊先生像



徐幹敬繪  
圖

墨莊先生像贊

珥彤盒馬兮節封圻臨政  
則澤侔春露研經剔照奪  
青藜繼鄭毛而踵起方賈  
孔而肩齊迺威儻抑二還

勝如不勝衣君子盛德容  
貌如斯非  
先生其誰有之

道光癸巳中元後五日

江陰汪道平拜題

求是堂詩集總目

卷一

悔存集 古今體詩六十四首

卷二

哀蟬集 古今體詩一百十二首

卷三

頁米集 古今體詩一百三首

卷四

授經集 古今體詩一百十六首

卷五



計偕集

古今體詩九十一首

卷六

倦遊集

古今體詩八十一首

卷七

結秀集

古今體詩五十三首

卷八

家居集

古今體詩五十九首

卷九

藏海集

古今體詩五十六首

卷十

寄藤集 古今體詩三十九首

卷十一

諭領集 古今體詩六十四首

卷十二

諭領後集 古今體詩七十一首

卷十三

道山集 古今體詩六十首

卷十四

銷寒集 古今體詩六十六首

卷十五

賞春集

古今體詩七十八首

卷十六

西臺集

古今體詩七十七首

卷十七

東瀛集

古今體詩九十一首

卷十八

歸田集

古今體詩七十首

卷十九

歸田集

古今體詩五十九首

卷二十

歸田集 古今體詩五十二首

卷二十一

歸田集 古今體詩三十四首

卷二十二

歸田集 古今體詩二十七首

詩餘附存

涇東溪頭都漵芳齋湯左之刊

求是堂詩集卷一

悔存集

涇縣 胡承珙

夜坐有感

讀罷殘編睡不成坐聽簷鐵響鏗錚英雄未必無天幸仙  
佛都難免世情星斗入秋垂瘦影關河連夜發寒聲誰家  
燒燭圍珠翠牆角依然卧短檠

詠史分賦

誰解窮途哭未休非關作達故沈浮永嘉南渡須臾事早  
卜新亭泣楚囚

右阮籍

明珠美玉可憐生洗馬丰神絕世清不信羊車眞看殺幾  
人著眼最分明

右衛珍

尋李太白萬家酒樓遺址

壘玉遺墩傍彩虹萬家邨畔酒樓空糟牀恍滴檐前雨帘  
影虛搖竹外風芳草春袍新樣綠桃花潭水舊時紅經過  
不惜金龜解判付浮生一醉中

依稀孤館翠微巔斷檻荒垣碧蘚連聽去踏歌明月岸到  
來寒食杏花天登臨卽事成今古風味何人辨聖賢悵望  
騎鯨消息斷夕陽邨落起炊烟

水西夜汎

扁舟乘興往水月共沈浮古渡人誰喚諸天景自幽鐘疏  
煙外寺燈隱竹西樓解纜滄波迴前灘發棹謳

敬亭山謁姜貞毅公墓

鬱鬱青松寒蕭蕭白日暮徑僻花草香姜公此邱墓勝代  
丁未造廷臣肆詆忤宜興再柄國狼籍恣賄賂誰與煽妖  
詞巧欲梗言路二十四氣中賢否固異趣詔下窮根株鉤  
連轉多故先生何堂堂扳闕遂抗疏逆鱗一以披雷霆震  
竒怒豈不識忠直禍性乖舉錯嫉時旣恚憤知過復廻護  
思陵十七載坐此卒貽誤天王自聖明臣罪不可恕賊氛

逼畿甸垂死宣州戍家燼國亦傾寸心裂誰訴痛哭胥江  
濤欲效汨羅赴哀哉易簣辭血淚灑成句骨葬敬亭雲魂  
飛萊陽樹華表久荒沒殘碑衰草仆恍惚魚山翁英靈尚  
來去

少年行

白面醉顏酖新豐市上過也知相識少只覺不平多代馬  
跑風立吳鉤帶血磨頭顱三寸在欲贈向誰何

寄友

去年共住陵陽郭薄泛雙溪燕尾分紅袖筵前將進酒青  
燈客舍細論文秋風幾度眞成夢舊雨相逢獨少君欲寄



愁心付團扇何人爲畫敬亭雲

勇里懷古

伏波棄隗囂淮陰奮廣武丈夫擇君事意氣重相許子義  
青州豪勇烈罕爲伍問道劫州章突圍赴文舉信義秉夙  
姿所從非其主獬兒橫江東二十健如虎神亭始相識英  
姿颯眉宇魚水會有緣面縛坐軍鼓遂忘射鉤讎談笑託  
心藹歸命期立竿前驅看負弩英雄共大業豁達各千古  
有子如孫郎不死羨討虜雖違白龍殃終啓赤烏祚建昌  
老都尉託身已得所阿瞞寄書來當歸不須貯至今古戰  
場雄風尚飛舞寶氣衝斗牛舊劒蝕塵土

土人曾於此地掘得古劒事載

邑志 緬懷知己感傾心快先親一諾已捐軀焉肯歸黃祖

夏夜讌集

小園經雨爽虛牖趁宵開流水穿花徑明河落酒杯靜窺  
雙鵲宿涼逼一蛩來折聖談何厭相逢歲幾同  
空庭交待藻幽壁掛藤蘿四座澹無語好風時一過星光  
疎動竹露氣潤歸荷不是傾家釀其如良夜何

山莊曉起

小牕天曙早戶外白雲深虎跡新泥印鷓聲古木陰寒烟  
生野井秋色入遙岑昨夜狂風雨應吹葉滿林

送舍弟之漢陽

長汝無多日難忘總角心十年常共被千里忽分襟芳草  
自春色飛鴻無定音誰能量別恨應比漢江深

題龍神獻佛圖

衆香國有無云在裨海外如來轉法輪空中喧梵唄普聞  
獅吼音畢集龍華會何人工白描作此殊狡獪妙相湧豪  
端神光透紙背應真競飛錫瑰偉各殊態大首佗欺僂出  
目驚睚眦牟尼體常圓筆筆色不壞定力扼猛噬蹴踏波  
浪碎紺龍垂豐胡青猊坼巨喙鬐鬐角何簪颯颯齒復齧  
百獸皆蔓延梁陸逞竒怪咄咄阿羅漢小乘頗自載我佛  
歡喜相獨得大自在半偈持妙明合掌空掛礙諸天禮鶯

王祥雲擁後隊氤氳五色香飄颻七寶蓋慈航一以駕滄  
溟渺帶芥天風何雷破海波何汪濺遙望金銀臺蓮花散  
奇采儵忽開驚瀧豁若雙流對萬頃澄玻瓈玲瓏絕埃壒  
罔象隨天吳閃屍走狼狽冰夷擊鼉鼓靈胥曳霓旆龍君  
搢玉笏見佛卽膜拜海童獰以猙尻雕紛負戴古器雲雷  
紋不辨鼎與敦龍女妖且韶明璫結翠珮珠盤擎火齊珊  
瑚潤紅肺簇簇隨神君鞠脰不敢退祖龍昔東巡一邀龍  
神話左右圖其形神怒岸崩潰今我展此圖却笑佛力大  
萬寶獻蜂臺百神皈象戒大瀛環九州安得此世界將毋  
畫工意祇博俗目駭狗馬難爲工鬼神易爲態杳冥惚恍

中豈必入三昧何如顧虎頭維摩壁上繪

題四絕圖

三代以下藝勝道史傳往往聲名垂琴棋善者推聖手書  
畫不妨顛與癡古今所稱絕妙技良由專擅兼者誰何人  
不廉概將去乃以丹青條貫之琴聲棋聲兩清絕紙上髣  
髴聞如斯解衣磅礴得書勢畫中之畫無聲詩人物點綴  
各生動貌閑神古非凡姿作者想已臻妙品乃以心手相  
摹追四端一理畢融會不然精神意態濡染何淋漓當今  
藝苑風流歇廣陵散絕無人知平生粥粥少能事豈止擔  
糞與着棋定應夙世匪書聖况復前身非畫師就中勝技

擇取一惟有無弦之趣稍能窺春風不用彈且鼓奚囊古  
錦常相隨安得焚香煮茗展此卷恍如獨立空山風雪時  
石巖山秋夜玩月

明月不滿尺流輝盈我堂坐久溼衣袖宛在池中央庭前  
一以望皎潔凝嚴霜峯巒靜夜氣草木浮清光碧雲渺無  
際所思天一方我欲夢游仙飄然歸帝鄉廣寒清虛府踏  
臂歌霓裳素娥隊如雲招招同迴翔授我瓊華笈飲我玉  
液漿珊珊鎖子骨泠泠冰雪腸因之乘長風倏忽遊八荒  
安能事膏油著書仰屋梁

白秋海棠

斷腸人去後寂寞幾黃昏不奈瑤階畔還留玉筯痕春風  
既無分明月獨銷魂秋色誰家早相思正掩門

恍惚聞彈指烟深何處尋數枝含露冷終日傍牆陰不共  
靈芸唾還同卓氏吟冰綃休更拭相對自沾襟

小院無人處亭亭只自芳久知憐薄命未敢鬪新粧怨極  
全銷豔愁多不解香蛾睂空淡掃羞入合歡堂

粉暈寒都褪檀心恨易灰秋風憐瘦影隨意委莓苔本色  
淡如許幽歡期不來夜深燒燭燼蠟淚亦成堆

尋菊同家蓮浦

世敦

翫雲

沛澤

雨茂才賦

黃花無恙慰相思覓向西風落葉時晚節聲名常自晦幽

人蹤跡本難知，蕭疎籬落。居應在、黯淡烟光路。欲迷見說，樊川移住。近可能、乞與兩三枝。

鱗螯肥候，泛糟牀擔。棹相隨，渡野塘。臨出門時，逢細雨到。無人境，有新霜。芒鞋竹杖，此生事，曲徑疎林，何處香，不惜帽簷欹。壓損滿頭歸去，笑顛狂。

殘菊

瘦影渾無奈，西風入捲簾。年華三徑晚，歸思九秋淹。舊夢尋籬落，餘香惹帽簷。芳菲從此盡，珍重一相拈。

小院霜飛後，深林月落初。田園花事歇，樽酒故人疎。憔悴依騷客，荒涼帶敝廬。猶應將翠竹，寂寂悟真如。



落葉

陡覺西風緊飄零思不禁空山聞急響淡月見疎林天尚  
憐幽草人誰憶綠陰祇應搖落處根觸歲寒心

聞鴈

澄霄萬里靜一鴈響汀洲星月忽然皎關山何處秋樓頭  
紛落葉天外有孤舟余亦離羣久蕭蕭永夜愁

家翥雲過話

閒居張仲蔚門徑滿蒿萊失意看饑鳥相思到早梅不逢  
良友至那得悶懷開拚與傾家釀看君覆掌杯

懷趙羽可達儀茂才

有美人如玉聰明絕勝予相邀圖景宿

君近爲天文推步之學

豈屑

註蟲魚獨樹臨風靜荒池浸月虛思君常永夕相憶定何如

夜坐

龜殼支牀穩鰓鬚稱牖垂風燈搖獨影霜樹落枯枝坐久親爐火愁深怯鬢絲拈豪頻得句書罷欲貽誰

閣上望山雪憶心一上人

新雪如殘雪霏微不滿山晨光明紙閣暮色冷松關淨映疎林出寒侵獨鳥還遙憐石巖寺禪榻久虛閒

冬晚野望

雀噪稻場空荒村吼朔風寒烟籠水白野燒接天紅日落  
銜孤岫雲歸帶斷鴻興闌頻徙倚疎磬出琳宮

夜坐

瓶裏梅花影有無水沉香燼博山孤好書未盡留殘燭難  
字多忘失寶珠藥爲勤丸名漸熟棋因懶劫局常輸中宵  
側聽飛鴻響第一關心歲月徂

除夕

體勢年增病生涯日就貧籌觚煩弱弟藥裏累慈親玉漏  
沉沉夜梅花細細春明燈張綺席行樂爾何人

生菜堆盤粉荔香絲雞蠟燕送年光筵前却恐傷親意先

酌屠蘇獻壽觴

立春日小飲

昨夜已東風風吹雪漸融人家烟景裏心事水聲中臘酒  
花萼碧春盤菜甲紅爲歡須及早何用畫虛空

邨外卽目

昨夜前邨雨朝來漲滿溪白雲離樹立黃鳥近人啼一徑  
落蜂蕊誰家香燕泥酒旗風弄影颺過小橋西

蝶

頻來芳草地易散落花風只解尋香切何曾惜豔空驚魂  
回伯起活計學秦宮春色堂堂去憐渠尚夢中

麥秋苦雨

日昨游陵陂愛此千頃麥爭先梅子黃畧後桑葢赤飽將  
噎鳩吭稠可藏鴉翻似聞林端鳥催刈聲正迫誰家婦與  
姑青巾抹橫額朝獲不終畝擔歸半狼籍其餘尚在田欲  
往日已夕從此簷溜聲三日未斷滴溝中蛙黽雄往來競  
跳躑陰霧重鬱蒸蝸涎滿籬壁惡溼麥性然詎堪浸宿昔  
廣場如束薪覆苦亦何益所嗟歲月勤四序更遷易成難  
敗輒易天公故相見但命屏翳收何須借霹靂始識農家  
言淺語深閱歷收麥如救火未雨信良策吾儕常素餐安  
坐不須屐高生漂豈知宓子棄可惜卻復懷杞憂耿耿未

易釋前潦後必枯驕陽六月赫此語如信然斯人豈安宅  
已判麥秭徹終期稻孫碧

積雨遣悶

出梅入梅梅未炎枝頭尚見青纖纖芭蕉浸透失新綠櫻  
桃爛墮無餘甜江南澤國異氣候重陰不散天如黥池暗  
久看螢火定壁明忽見蝸涎黏閒窗展帙不終卷意氣慘  
淡誰能忤體中豈有不佳處隱憂未免私窮閭膏澤前盈  
後易竭所恐霹靂今時兼入秋轉絕老農望今春况少豐  
年占我聞歲有分龍日勤惰一掾垂胡髯或屯其膏或濫  
費傷惠豈必殊傷廉搖髮一滴水一尺敢從天律干森嚴

龍乎龍乎曷不歸向深淵潛頃刻放出朝陽暹百物腐敗  
那暇惜但令禾稼毋多淹旣秀旣實如排籤十日一拜甘  
霖霑

雨後琴溪橋上玩月

日暮投宿處已滿座上客入門問行李猶有幾兩屐對竈  
一燎衣不遑理敝策信步登溪橋林巒淡將夕暝色下層  
巖溪烟疊如積倏忽與之交遙空混一碧俯瞰指橋影落  
水如渴虹仰見天上月飛掛東南峯流光泝空明萬象深  
玲瓏夜久羣籟息古洞生清風淅淅如有人應是琴高公  
欲往從之游赤鯁驂白龍僕夫走相促琴聲聽未終啞啞

荒雞鳴茅屋燈光紅

酷暑雜言

天遣祝融作酷吏炎曦燒空火雲熾焦金爛石無子遺毛  
髮未熱心先悸身所不得口欲言聊借筆墨書快事安得  
仙人驂玉鸞清都紫府生夜寒金銀爲宮闕七寶爲欄杆  
披五銖之衣戴九雲之冠琳腴石髓貯金甕紅蕪碧藕供  
玉盤與我同聽浩露秋霜曲贈我以飛雪之散元冰丸不  
則豪華盛會金閨彥道暑頻開河朔讌案上閒堆一尺冰  
堂前自運七輪扇浮瓜沉李無時無那識驕陽似爐炭更  
不然亦有娛情坐視北避世棲牆東孫綽庭中松一樹羅



含宅內蘭數叢掇幽芳而蔭喬木釣游鯉而弋高鴻世間  
快事乃有此神仙富貴將毋同胡爲乎挾書冊裹章縫奔  
走喝死心忡忡吾愛嵇叔夜又懷阮嗣宗平生多少不堪  
事何須自入禪襠中俯仰徒作可憐蟲今旣不能餐霞吸  
露登蓬萊又不能築香姜閣與冰井臺但思東頭竹篠飲  
惟有散髮狂歌歸去來

雙谿

眼界雙流豁飛虹滿鏡秋平添荻苗水半浸蓼花洲魚步  
沿溪網人家夾岸樓臨風獨惆悵名士古宣州

一道通闌闌人烟乍有無柳陰魚自聚沙港鴨相呼渡舫

輕編竹樵薪細束蘆高吟如畫句流韻滿平蕪

鼇峯對月憶家

石磴迂迴上危亭枕女牆一方人在水萬戶月如霜夜氣  
浮山動秋聲帶樹長爲看親舍近應念葛衣涼

歸燕

羨爾雙棲久依然萬里歸秋風催木葉同向塞垣飛舊壘  
留將補新雛各自肥相逢孤雁語好囑避虞機

溪橋玩月

長橋如落虹影卧碧溪裏遙山生暮烟不辨蒼與紫月出  
天宇開皎徹鏡潭底流光汎崇蘭寒香落桂子酌酒月滿

杯回看忽在水圓靈不可掬風漣散穀綺美人渺何處白露溼芳芷

早起

一夜檐前雨新涼透曉櫺片雲粘岫白叢竹過溪青蛤吠熟蛙稻魚吹開沼萍鉤簾移淨几隨意寫黃庭

秋老

追涼能幾日白露已淒其秋老蒼聲急夜長燈影知更無行樂處多是坐忘時牕隙西風入蕭蕭動鬢絲

秋日感懷

瑟瑟涼飈敗沼荷盈盈冷露溼庭莎年華見樹悲如此心

緒聞歌喚奈何病後衣裳勞檢點貧餘門巷少經過秋來  
雅有扁舟興欲向吳江覓釣蓑

側身天地合多憂况復窮途值暮秋知己分難誰說項逢  
人計拙莫依劉乘風燕雀高飛急蓄水魚龍永夜愁別有  
傷心聽不得一聲長笛月當樓

少小雄心孰後先滄江歲晚我猶眠懷人碧草三千里墮  
地紅塵二十年句曲春光衣上酒秣陵秋色夢中烟消磨  
半世爲形役虛讀南華第一篇

不緣寂寞草元文欲學君苗筆硯焚名士自來如畫餅美  
人多半作行雲青山有約成千古明月誰家占二分剩把

狂歌與痛哭逃禪猶恐落聲聞

落日西風鬢影寒半爐沉水一蒲團文章舊業成雞肋身  
世空時付鼠肝結習如花看灑落交游剩竹報平安酒旗  
歌扇當年事都作楞伽幻相看

由來臧穀等亡羊裘敝金空夢一場自分數竒休問卜尋  
思孽少不焚香時將彩筆題桐葉更簇銀燈照海棠佳醞  
滿瓶書滿架判教心事付滄浪

蘭石懷古

昨過烏溪嶺

嶺有桓侯廟

今來蘭石山戰場事往二千載靈魂

毅魄如往還咸和主幼國步蹙大舅小舅皆碌碌歷陽豎

子徵不來天狗墮地聲如雷敢向山頭望廷尉兵纏紫極  
臺省沸桓侯卷甲趨石頭五表陳師盛意氣進戰不利還  
屯涇視死如歸已無二此時健者命將軍摩抄寶劍看血  
痕桓侯不負國肯負桓侯恩此語慷慨今如聞一夫當關  
兩驂殪鬼雄怒吼天爲昏桓侯踰年亦糜殉繫韉地下猶  
主臣噫吁噫霹靂雲指萬春矢爲主捐軀如此人心忠佞  
難等論勸降乃有神長史典午風流實診孽高牙大纛皆  
鼠竊汗人可嘆元規塵落旄堪笑茂宏節當時名位徒悠  
悠誰信將軍心似鐵桓公祠下衰草荒嶺雲如旆空飛揚  
將軍雲祲尚繁衍歲時俎豆蠲烝嘗白湖蕭蕭咽流水紫

山兀兀明斜陽下家父子青溪柵三處同焚一瓣香

青弋江櫂歌

南上涇川接賞溪淡烟疎雨漲平堤落花片片船頭過知  
有春光在水西

沙洲拾鼈馬蹄樣琴客寄魚龍鬣名自熱松枝將煮酒江  
鄉風味過清明

細石苔紋似若耶秋林橘柚幾人家順風香氣鄰船送載  
得滿船宣木瓜

帆檣估客集澄淵時有呼來賣酒舡鳴脚堆盤堪入饌雞  
頭滿把不論錢

石磯分峙岸西東碧水瀠澗一鏡中安得人生盡如許馬  
頭無處不相逢

馬頭  
磯名

前緯後緯腰膝酸長篙短篙如矢攢歸舟過此便愁絕要  
上三門六刺灘

閒敲白石掛青蓑水國年豐樂事多出便駕船歸荷鋤大  
農陂上聽秧歌

他江縱比此江深不及江波徹底清爭怪儂家江上住年  
年風浪不曾驚



求是堂詩集卷二

哀蟬集

涇縣

胡承珙

墨莊

悼亡詩

六七年來春共秋

用韋莊句

春花秋月憶糕樓早知相守無多

日回首浮雲悔浪游

蝦蟆衣葉滿筠籠采采何人笑語同正是桃花新結子可

容平地五更風

鹿車鴻案事都休敢望同心到白頭但使彌留嘗藥餌也  
教不枉嫁黔婁

左家嬌女不勝癡索母頻煩繞舊帷愁聽旁人相誑道阿

娘暫去不多時

頻年杼軸出寒檠布襪青鞋手製成忽漫風聲裂窗紙續  
麻真觸舊人情

秋風幾度鍛輕翰射雉無才一笑難今歲滄江高卧晚牛  
衣誰識仲卿寒

尺幅溪藤手自裁簪花仿格付粧臺而今燈影寒牕裏更  
有何人問字來

繡簾風細聽煎茶更淪紅泉課浣花一自雙棲成折翼小  
園誰共種胡麻

曾將五勝卜虛盈噩兆無端骨暗驚細揣德容無死法是

儂命薄不關卿

空房慣怯可憐生况復茫茫弱魄輕曾伴小姑教刺繡夜

臺相遇可偕行

子四妹於  
去年天亡

返魂香細渺難期續命曾無五色絲剩取一奩紅豆子泉  
臺何處著相思

悲埏

名山攜手素心違陌上香車事亦非十載茹齋猶剩白五  
更織素已停機棲靈兒小無多伴具殮家貧只舊衣同穴  
百年終有日夜寒休自倚泉扉

情魔愛劫總空華隱几維摩未有家不奈秋風吹髻影更

看明月上窗紗  
冥緣枉訂三生石  
仙路虛逢八月槎  
留得藥爐經卷在  
祝卿先證妙蓮花

七夕有感

烏鵲梁成玉漏催  
生離底事久徘徊  
但教隔水人猶在  
一世何妨不見來

中元爲亡妻設奠口占

謝女空庭竟不歸  
施燈設食是耶非  
紙錢化作青蝴蝶  
應向斷腸花上飛

過外舅宅作

漫將弱息配王郎  
掌上明珠碎夜光  
腸斷箇人平日語  
願

郎恭敬莫相忘

東廂無語夜沉沉翁姥相看淚滿襟  
贈與薄情遺念物嫁時留下舊犀簪

續悼亡詩

零落池中並蒂蓮空房一到一淒然  
拾釵撚線依稀事何處思量不可憐

繡佛常拋布施錢爲祈母壽想夫憐  
而今兩地相思淚滴滴何能到九泉

啼鳥巢毀祇完胎待哺啾啾事可哀  
黃襪倩人相代着思兒會否夜深來

十年未繫看花驂  
擁絮情懷共苦甘  
從此狂奴忘宿志  
五陵裘馬欲生慙

鈿雀銀蟬委宿塵  
可憐風月不常新  
寶釵尚有書堪寄  
未信秦嘉是恨人

一卷楞伽靜裏持  
蕭蕭禪榻鬢成絲  
魂歸那覓郎居處  
無復書聲似舊時

雪色疎櫺久不開  
粉奩脂盞半生埃  
惟餘三五圓時月  
猶照盤龍舊鏡臺

蕭齋春色上梅花  
小折親拈貼鬢鴉  
隔歲不知人已去  
數枝疎影自橫斜

乍拂凝塵簾竟牀輕綵布被情誰裝夢同一夜寒如水試

道相思長不長

長相思被中綿也  
古詩著以長相思

冰垂玉筍千條淚燭燼銀花一寸灰夢裏相逢猶有恨雙  
眉愁鎖不曾開

空懷荀粲悲愁意曾少高柔愛玩心幾爲微言頻斂黛一  
回追憶一沾襟

圖形薛媛不勝情辛苦還應較瘦生未把丹青描小照却  
從何處喚卿卿

檀痕黛色太離迷彩筆描蛾八字齊今日影堂供粟主不  
堪和淚手親題

一孟薑橘味初調常伴靈筵慰寂寥莫恠寓錢焚較少郎  
家生計益蕭條

百年信誓總成陳記取人間未了身若使轉輪王信有臂  
環眉鈿是前因

愁懷襞積千般事欲語無從喚奈何女未垂髫兒未鬣長  
眠累我不眠多

冬夜悼感

歲月日以短憂思日以長芳枝隕朔吹密林凋繁霜衆鳥  
各有侶歸飛羣迴翔夕陰下簷隙孤燈生圓光永懷死生  
感淚盡神愈傷隱几不能寐執卷如有忘偶然遣懷抱忽



爾摧心腸幽明理已隔焉能知其鄉惟餘鍼線跡留我寒  
衣裳銜悽自終夜萬念徒徬徨

雜感

別鶴初彈已碎琴那堪腹疾更秋霖窗前忽長相思樹枕  
上猶遺共命禽敲斷玉釵人不見盼窮金椀信常沉口脂  
面藥俱黃土留得當年結髮簪

震靈無地覓仙丸欲問鴻都術更難三寸舌存誰爲視九  
迴腸結不能寬綢繆小印花長謝宛轉清歌月已殘懊煞  
黃雞輕唱曉教人無夢到槐安

記得

殘年風雪獨坐塊然柱絕奩空淒涼滿目回思往  
日閨房中事歷歷如在目前記憶所得援筆存之  
噉殺之音殊無倫次第以語出傷心詞皆實紀苟  
有覽者亦猶見不忘簪履之意云爾

頻年蒲柳怯秋初蟻鬪驚聞榻墮虛記得病眸清徹夜伴  
人風雨紙窗疎

蒲帆一幅石頭城屢卜油花兆未成記得輕裝費料理中  
宵刀尺響錚錚

閒隨女伴祝鍼神采勝香花色色新記得踏青催製履問  
郎雲鞞可宜春

烏皮小几臨軒置翠纈疎簾隔牖垂記得連城攜小鎮蠻  
箋重疊界烏絲

名裘倚酒事全乖二十生年故紙埋記得空囊羞澀日買  
書曾累質金釵

微寒小閣又黃昏若冷香殘欲斷魂記得圍爐聞栗爆驚  
看繡褥有焦痕

蛛絲鼠跡滿粧臺金縷衣箱慘不開記得燈前邀象戲輸  
將約指兩三枚

嬌兒都看破衣裳始羨人家繡襍裝記得去年端午日爲  
兒親繫紫羅囊

除夕

爆竹聲殘一歲終  
椒盤守歲與誰同  
屠蘇獨酌杯浮綠  
商陸頻添火熨紅  
此日藏彊猶有恨  
當年抱鏡已成空  
何須鶴髮雞皮日  
始信人生似夢中

閒庭寂寞意無那  
轉怕逢人強意多  
栢子爐烟空篆繞  
梅花燈影奈愁何  
奩空尚認宜春字  
絃斷休翻子夜歌  
長命杯觴親暖火  
一生心事兩蹉跎

和家元峯

承辭

廣文兄悼亡

微吟洗馬善言愁  
畢竟相偕已白頭  
更有傷心羊長史  
不禁觸淚雙流

君如摩詰病無家我學安仁感鬢華  
夢斷香銷同有恨殘年風景似天涯

送人入粵扶親喪

亦有臯魚淚臨歧灑滿襟與君同飲恨  
此別更傷心楚國妖氛惡

時川楚教匪尚熾

蠻江瘴癘深越王臺縱好愁絕莫登臨

去國六千里蕭蕭匹馬愁羣山連桂嶺  
衆水下梧州惻愴招魂意艱難旅食謀  
灘瀧三百六好避庾郎舟

留別石巖寺示心上人

領畧風光又一年溪山如畫樹如烟  
僧歸夕照青松逕人種春流碧玉田  
儘拂衣裳和翠坐閒拋書冊抱雲眠  
終思

頭白歸來約莫調鴻泥印偶然

送家橐西奔親喪漢中

把袂難爲別  
驪歌續挽歌  
麻衣衝白雪  
臘月渡黃河  
戰地多荆棘  
天涯廢蓼莪  
更愁歸路阻  
盜賊近如何

春日悼亡

憔悴年來剩瘦筋  
曉梳華髮落紛紛  
青衫淚盡誰憐我  
紅豆花開又憶君  
簾外暮愁縈細雨  
樓頭春夢逐浮雲  
微寒料峭偏相逼  
知是香篝久不薰

樓上

高樓獨自倚晴巖  
盡送天光入碧潭  
人面桃花眉樣柳  
斷

腸春色滿江南

寄友粵西

一別經三月知君過桂林天涯芳草斷橫外白雲深策象  
驚蠻俗飛鳶愴客心還愁薪米價傾盡橐中金

垂絲海棠

曉起華清宮餘酲印頰紅侍兒扶未穩一笑倚東風  
十年趙家兒長身何楚楚曾否聘梅花低頭無一語

哭趙晴巖

暉  
姊夫

長我春秋近十年初騎竹馬識君賢真總轡息千里元  
叔看囊賸一錢奕葉爲儒團有忌名山修道竟無緣水西

花竹渾如舊愁過黃壚思悄然

君兒我女兩牙牙重附絲蘿作親家我未化雲君化鶴女  
方無母婿無爺百年累重愁難任兩世交深痛倍加猶恐  
慈闈闕此耗不堪衰髮淚如麻

書悶

鋪首經年澀綠苔空房遺掛半樓埃士衡兄弟三間共元  
相夫妻百事哀竈北烹雌徒有恨山南射虎更無才名心  
消滅渾何似閒倚薰爐撥冷灰

憶家蓮浦翥雲金陵秋試

十年躍馬竟何成伏櫪無心更請纓衣上漬痕前日淚夢



中開喜故人情遙憐璧月清淮夜同聽瓊樓豔曲聲知否  
小山成獨隱秋風叢桂暗香生

賦得秋夜長

秋夜長銀河耿耿星無光玉階蟋蟀訴秋怨金井梧桐生  
晚涼澹澹清風初拂水娟娟白露欲爲霜清風白露衣裳  
冷滴轉銅壺漏聲永風送芙蓉檻外香月低楊柳樓頭影  
長夜年年有此時此時能不長相思征人塞上荷戈早少  
婦機中織錦遲烽烟處處傳邊警砧杵聲聲泣別離別有  
長門愁不極翠華恩盡空相憶金鑰扃深自寂寥銀餅纒  
斷無消息秋風不惜團扇捐長夜空悲好顏色顏色如花

不耐秋商家怨女上粧樓方塘水冷鴛鴦睡屈戍宵閒鸚  
鵡愁妾自樓中坐空閣郎今江上宿孤舟空閣孤舟會相  
見那堪寡婦終宵怨窗前別鶴掩羅裙鏡裏孤鸞拋翠鈿  
白髮難銷秋月心紅粧已毀春風面春風秋月遞相尋此  
時那不淚沾襟羈人萬里他鄉淚蕩子三年故國心誰家  
夜宴闌綺疏青燈綠酒紅氎氍毹翻翻妙舞雙垂手宛轉清  
歌一串珠玉鈎倒卷同心帳銀缸斜映合歡褥合歡不識  
東方白獨有愁人愁惻惻參橫月落烏夜啼曉窗一抹秋

山碧

秋草十首

萋萋芳草滿閒門，剩得秋來綠一痕。  
水冷池塘空入夢，日斜庭院易銷魂。  
靈根在，詫蓬壺，種薄植常違。  
雨露恩無限，含情如欲訴，不知何處覓王孫。

記得東風甲坼齊，杏花含蕊柳含稊。  
一簾青入人初見，三徑春深蝶欲迷。  
活色慣沾袍袖濕，芳心閒暈黛眉低。  
而今寂寞蕪城路，祇任殘茵覆曲堤。

憐渠憔悴負春華，羞作裙腰一道斜。  
小苑無人將歲暮，長亭有客尚天涯。  
新愁黯澹驚啼鳩，往事飄零憶落花。  
贏得牆陰容位置，又隨苔影上窗紗。

幾經晴雨漸離披，一種芳姿各自萎。  
騷客從來悲晚晚，美

人終古守葳蕤劫灰野火燒原早消息春風隔歲遲多少  
尋常易滋蔓有人誤認九光芝

陵晨添得幾莖霜迴首芊緜祇自傷青塚可憐眞薄命朱  
門無處覓餘芳懷人絕塞空沙磧弔古平原半夕陽不奈  
重增惆悵意三更根畔咽寒螢

誰家猶唱滿庭莎踏徧閒階與奈何市地幾經歌舞換藉  
人偏記別離多湘君日暮貽芳杜山鬼秋深帶女蘿讀罷  
靈均幽怨語起看殘翠半消磨

蕭蕭墮葉響林端冷露無聲溼作團有恨只宜臨曲澗多  
情猶自護危欄苔岑臭味原無幾萍水生涯總一般莫爲

羣芳緝舊譜芝蘭縱好待誰看

細葉輕茸碧一灣蕭條終日掩柴關  
剪除有幸非當戶潦倒無心更出山  
古徑荒村烟漠漠斷橋欹岸水潏潏  
平鋪恰勝寒氈輒留待幽人自往還

水國霜清氣沈寥相隨蒲柳一齊凋  
風光候轉都非昔烟雨痕深尚未消  
幻夢三生螢火燼高秋八月馬蹄驕  
殷勤寄語樵蘇客莫共擔薪拉雜燒

杖藜曳履重徘徊歇盡芳心亦可哀  
金埒塵飛空有迹翠裙踪杳更誰來  
也知天意憐幽谷敢向人間傲散材  
思與溫存憑濁酒等閒澆盡掌中杯

戲和家元峯兄妻梅絕句

名花不向夜泉開，幾度粧樓泣鏡臺。  
却覓返魂香未得，輸君先取嶺頭梅。

孫楚鰥居又一年，詩成除服淚如泉。  
誰知粉鏡重粧點，續命新來馮小憐。

世外佳人冰玉姿，相逢肝膽正相宜。  
新詩莫恨無人唱，便把瓊兒當雪兒。

投老應須暖玉窩，綳裙練帨奈寒何。  
太常近是清齋慣，不用千金買腳婆。

嫣然一笑見橫枝，生恐東風遣嫁遲。  
料得巡檐難強步，三

更秉燭對吳姬

君左足  
備廢

讀罷新詩我亦邪無端思過玉川家愁他靜濯明粧後不  
向傍人置齒牙

自笑重彈十五絃新聲舊曲兩纏綿何如覓得幽香伴明  
月清風當聘錢

送家彙西赴關中

聞道妖星猶隴右對狼何日殫天戈中原此日軍書急名  
士從來幕府多芳草離亭歌白紵棟花風信渡黃河故人  
亦有從戎志未肯從容老薜蘿

書朱丈立亭

森桂

和陶詩後

柴桑千載闕元關白傅風懷未易攀不讀韋郎答人句誰  
知妙是見南山

戲贈醫者庾含光

有何黃老君作崇招二豎使我倉廩不得開氣邪競塞太  
素府五漿三飯密駢門日啜雙弓米堪數何人洞見垣一  
方知我所患脾半腐夢中爲我一列腸盡吸西江洗臟腑  
君家世系本諸庾住傍浮邱與慈姥獨得長桑肘後方甲  
乙靈樞妙覩縷賣藥翩然來市中白鬢蒼髯貌何古相逢  
爲我破癥結道我從來讀書苦讀書何至遽傷生况未縣  
頭復刺股年時却讀華專傳弟子雖多首吳普從師學得



消穀法血脈流通樞在戶五禽妙戲身手輕其名烏猿熊  
鹿虎我欲效此常施行庶與君方劑相輔秋風便掛金陵  
帆壺中好覓東道主此時無恙沈家脾老饕復作誰能禦  
將毋悔不養吾病頓使先生輟羹釜

秋試留別舍弟景湯

躍馬從軍天正秋臨歧撫髀不勝愁日南老將無功業慚  
媿平生馬少游

舟中望水西感懷趙晴巖姊夫

落日明船背推篷見畫圖風光雙塔迴烟雨一亭孤竹色  
連天碧鐘聲度水迂平生窮鳥賦齋志問泉塗

晚泊采石

落日渡江口，征帆次第收。  
青山始孰路，黃葉秣陵秋。  
漁火連星動，人烟夾水浮。  
來朝風信好，擊汰沂中流。

太白樓

大江無風波浩浩，危樓勢壓衆山倒。  
烟寒日暮收征帆，極目長江送飛鳥。  
先生昔日登天關，紅塵謫落無時還。  
世皆欲殺往何處，竭來意氣陵江山。  
江山如此足銷魂，烟霞變滅殊朝昏。  
詩成萬象供驅策，興酣五嶽遭掀翻。  
羣兒齷齪不足數，引杯看劍色飛舞。  
一朝撒手騎長鯨，惟有青山自終古。  
錦衣玉貌何堂堂，畫圖四壁開蒼茫。  
驚濤楚踏鼉鼉

走茂林翁蔚颺颺藏即今憑欄足感慨夜郎讒放非其罪  
生前惟有杜老知死後却賴陽冰在挽取長江作酒瓢鐵  
鑿一曲魂爲招白雲明月兩無盡搔首欲問蒼天高

秋江曉望

極浦開明鏡中流擁翠微游魚吹浪起宿鷺帶沙飛曉日  
新林港寒潮燕子磯江神應識我猶自著麻衣

古戰場題號舍壁

日暮陣雲黃重游古戰場虎頭空自負猿臂總堪傷力盡  
衣皆血心灰髻有霜何人吹鐵鑿清淚落伊涼

八月十五夜雨

萬籟鳴秋夜漏長三條燭燼已無光西風忽送蕭蕭雨明月多應在故鄉

歸舟

輕舟流滯楚江隈寒雨濛濛望不開莫笑年時空瑁璫也曾看飽蔣山來

秋試報罷

此事真如蜀道難崎嶇歷盡尚漫漫三年祇學屠龍技九轉終成化鶴丹冉冉夕陽依樹晚瀟瀟秋雨逼窗寒飛鷺總被風吹墮辜負旁人著眼看

寄家荔雲

憑將剡紙問狂奴擁鼻微吟定憶吾貧女生涯拈繡線腐  
儒風味稱冰壺飄零漢上題襟集潦倒高陽舊酒徒惟有  
石巖山上月猶分清影照菰蘆

收遺卷作

一番羶毳總成空到此休誇筆陣雄杜宇血消花久謝春  
蠶絲盡繭無功拋錢買卜年年淚剪紙招魂夜夜風且向  
沙場收折戟傳觀曾是六鈞弓

祇合長江付濁流誰爲迢遞寄書郵機中錦字燔何惜竈  
下琴材棄不收駿骨欲枯休望市蛾眉重畫祇增羞尋思  
苦海都無岸尺幅平添萬斛愁

干將歸匣銳先摧  
嬾更摩抄日幾回  
倦鳥羽毛遺瀚海  
敗龍鱗甲落驚雷  
夢殘古寺留香穗  
秋老荒池拾劫灰  
不信紛紛皆落紙  
有誰能唱夜珠來

亂書堆裏伴寒氈  
團扇空箱共棄捐  
敢信長恩猶有鬼  
祇教脈望不能仙  
黃金費盡春無色  
白璧埋深夜有烟  
檢取名經對千佛  
可堪值得幾文錢

應愧豚蹄祝太奢  
汙邪原未辦盈車  
江湖滿地收空網  
風雨無人葬落花  
壘塊只宜澆盃酒  
飄零不惜補窗紗  
却愁燭跋宵深後  
化作青燐一道斜

戲謝心一上人分送牡丹二本

圈馨和尚頗跌蕩日取名花作供養居然倚翠復假紅教  
法風流獨持掌憶昔禪房讀書日暇即拈花到方丈就中  
鼠姑尤妖嬈紫雲未乞神已往此心早爲彌勒知如倩麻  
姑爪搔癢晨扉急叩來沙彌仙種一時頓有兩此花出家  
復在家禪榻何如對書檝來歲花開三月暮九錫先張重  
頂幌新詩美醜相流連不妨更許師來賞回頭却怕馬師  
棒我與老僧俱妄想

歲暮解館別諸同學

零落拈書籍相依又一年白沙歸寺月紅雨隔溪烟宿草  
傷春淚及門趙生於今春病歿精廬困晝眠諸君幸年少努力著鞭

先

落拓竟何成，棲遲轉有情。  
危樓倚山翠，高枕納溪聲。  
身計憑筠管，年光付木檠。  
消磨空素志，幾欲證無生。

一卧滄江晚，韶華不可尋。  
秋風殘夢醒，夜雨積愁深。  
海上水仙操，隆中梁父吟。  
永懷寥廓意，物我兩難任。

白紵無拋日，青氈少暖時。  
風箏吹別調，雲路渺前期。  
作計隨人慣，安身到處宜。  
何須更惆悵，擇善爾多師。

送家玉鏢

世琦

孝廉計偕入都兼充

國史館謄錄

詔下蘭臺給札翰，重攜溫卷入長安。  
奇書倘許窺中祕，珍膳何須飲大官。  
塞北鴻歸君莫問，江南花落我猶寒。  
明年



此際櫻桃宴應有佳音拂釣竿

宿夜識軒懷朱丈立堂揚州

君卿老作諸侯客杜牧多從勝地游歌吹十年成舊夢烟  
花三月動春愁我來別館空懸榻公在遙天定倚樓剪燭  
西牕清不寐心隨明月到揚州

示內

空箱織素久蒙灰嬌女無衣倩試裁記否藥欄嬉戲日有  
人流淚託琴臺

擬古

翩翩雲中禽育育水底魚禽魚各有侶人生胡爲久離居

妾今能救魚尾赤不能與郎代作客妾今能使馬蹄方不  
能使郎早還鄉深閨無人晝悄悄落花滿地慵不掃花枝  
顏雖紅不如青青牆下草征人雖封侯不如相守閨中老

過書肆作

吾生無嗜好頗愛架上物豈曰供沉酣聊以快心目所苦  
澀澀囊叢殘未盈籠有如過屠門饞嚼不得肉又如游海  
藏焰朗空駭矚駿馬何權竒無由致驂服美人長相思明  
珠乏千斛悲哉坡公言令人痛心曲少日苦無書旣得不  
能讀亦知不能讀終須償所欲不控紫駟韁不貯黃金屋  
崔儵五千卷張華三萬軸南面輕百城何問令與僕

雜感

鷄鳴見羣動營營各有謀得失紛異趣高下誰能侔販貲  
挾奇貨意氣橫鄉州亦有泝泝統或用以封侯誦三十萬  
言囊粟不可求車中有七尺車前無八騶著書仰屋梁身  
世空悠悠

荆山有奇珍獻者別其足燕石以爲寶什襲納諸櫝未逢  
燕客笑祇聞卞和哭物情昧是非貴珉而賤玉所以明月  
珠闌投自取辱

溢米腹可充斗室膝可容人生無百年飛塵隨輕風愚者  
競錐刀歛怨以自封積金不能用毋乃瓦礫同瓊林與大

盈轉眼俄成空何况暴富兒培克圖有終

猛虎居深林出目鋸牙爪咆哮有餘威食人以爲飽世無  
飛將軍何愁應弦倒仁獸如騶吾行行避生草無端入陷  
穽有時遇僥狡善敗爽厥施天心太茫渺因之狐鼠羣出  
沒紛佻巧南山有老羆不敢卧當道

古人重經師詔書面無北服勤期終身就養殊盡職今茲  
何所似傭工給其直較量分錙銖督責嚴晷刻晝寢有後  
言假益生慘色薄俗安足嗤感此爲心惻蜀犬何噉噉彼  
罔不知日

張耳暨陳餘把臂誓生死見利遂忘義交情那可恃豈惟

交情然骨肉且如此明明同氣人一朝以利市內釁兆闕  
牆外侮詎能止參辰尋干戈兩敗俱傷耳不見譚尚爭頭  
顛走萬里